



REPUBLIKA E SHQIPËRISË
AUTORITETI I KONKURENCËS
KOMISIONI I KONKURENCËS

VENDIM

Nr. 891, Datë 14. 06. 2022

“ MBI AUTORIZIMIN E PËRQENDRIMIT TË REALIZUAR NËPËRMJET PËRFTIMIT TË KONTROLLIT TË SHOQËRISË AUTOZENTRUM SPORT AS NGA SHOQËRIA DR. ING.H.C.F. PORCHE AKTIENGESELLSCHAFT”.

Komisioni i Konkurrencës me pjesëmarrjen e:

Z.	Denar BIBA	Kryetar
Znj.	Leida MATJA	Zv/Kryetar
Znj.	Adriana BERBERI	Anëtar
Znj.	Rezana KONOMI	Anëtar

Në mbledhjen e tij të datës 14. 06. 2022, shqyrtoi çështjen me:

Objekti: Autorizimi i përqendrimit i realizuar nëpërmjet përfimit të kontrollit të shoqërisë Autozentrum Sport AS nga shoqëria Dr. Ing.h.c.F. Porche Aktiengesellschaft.

Baza Ligjore: Nenet 2, 10-12, neni 24, germa d, dhe nenet 53-64 të ligjit nr. 9121, datë 28.07.2003 “Për mbrojtjen e konkurrencës”; Rregullorja “Për zbatimin e procedurave të përqendrimit të ndërmarrjeve”; Udhëzimi “Për formën e njoftimit të përqendrimit” dhe Formulari i njoftimit të përqendrimit.

Komisioni i Konkurrencës, pas shqyrtimit të relacionit të Sekretarit të Përgjithshëm si dhe raportit të Drejtorisë së Analizës dhe Metodologjisë së Tregjeve, mbi njoftimin e përqendrimit të realizuar nëpërmjet përfimit të kontrollit, nëpërmjet blerjes të aksioneve të shoqërisë Autozentrum Sport AS nga shoqëria Dr. Ing.h.c.F. Porche Aktiengesellschaft.

VËREN SE :

I. Palët në transaksion dhe procedura

Pranë Autoritetit të Konkurrencës është depozituar njoftimi mbi përqendrimin e realizuar nëpërmjet përfimit të kontrollit, nëpërmjet blerjes të aksioneve të shoqërisë Autozentrum Sport AS nga shoqëria Dr. Ing.h.c.F. Porche Aktiengesellschaft.

Referuar “Marrëveshjes së blerjes së aksioneve”, datë 02 maj 2022, palët janë:

Pala blerëse: *Dr. Ing.h.c.F. Porche Aktiengesellschaft*, është një shoqëri publike, e themeluar sipas legjislacionit Gjerman, me objekt aktiviteti: Prodhimin dhe shitjen automjeteve dhe motorëve të të gjitha llojeve, si dhe pjesëve dhe montimeve për produkte të tilla dhe të tjera teknike, etj.

Dr. Ing.h.c.F. Porche Aktiengesellschaft është bërë pjesë e Grupit Volkswagen që nga viti 2009.

Grupi Volkswagen është aktiv në të gjithë botën në zhvillimin, prodhimin, tregtimin dhe shitjen e makinave të pasagjerëve, automjeteve të lehta tregtare, kamionëve, autobusëve, shasive për autobusë dhe motorët me naftë, biçikleta motorike, duke përfshirë edhe prodhimin e pjesëve rezervë dhe pajisjeve shtesë. Grupi Volkswagen gjithashtu angazhohet dhe në shpërndarjen e automjeteve.

Grupi Volkswagen, operon në Shqipëri përmes shoqërive të zotëruar indirekt prej tij: Porsche Albania SHPK dhe Porsche Leasing SHPK.

Porsche Leasing SHPK është një shoqëri me përgjegjësi të kufizuar, e themeluar sipas legjislacionit shqiptar, me objekt aktiviteti; veprimtari e qirasë financiare, agjent në sigurime.

Porsche Albania SHPK është një shoqëri me përgjegjësi të kufizuar, e themeluar sipas legjislacionit shqiptar, me objekt aktiviteti; shitje me shumicë dhe pakicë të automjeteve të të gjitha llojeve, pjesëve dhe aksesorëve të tyre, kryerje e riparimeve të të gjitha llojeve të automjeteve, përfshirë montimin e automjeteve të përfunduara, modifikim i automjeteve dhe prodhim i pjesëve dhe aksesorëve, etj.

Pala shitëse: *Autozentrum Holding AS*, është një shoqëri private me përgjegjësi të kufizuar, e themeluar sipas legjislacionit të Norvegjisë, me objekt aktiviteti: Prodhimi i motorëve dhe turbinave, përveç motorëve të avionëve, shitja, mirëmbajtja dhe riparimi i mjeteve motorike dhe motoçikletave/shitja me pakicë e karburanteve të automobilave, shitje makinash dhe mjeteve motorike të lehta, etj.

Shoqëria Target: *Autozentrum Sport AS*, është një shoqëri private me përgjegjësi të kufizuar, e themeluar sipas legjislacionit të Norvegjisë. Shoqëria *Autozentrum Sport AS*, është një shoqëri distribucioni automjetesh me fokus në importin dhe distribucionin e automjeteve, pjesëve dhe aksesorëve të markës Porche përmes një rrjeti tregtuesish të autorizuar të Porche në Norvegji. Shoqëria target zotërohet tërësisht nga shitësi.

Autozentrum Sport AS nuk ka prezencë ligjore në Shqipëri. Aktiviteti i saj është i kufizuar vetëm brenda territorit të Norvegjisë.

II. Përqendrimi

Referuar “Marrëveshjes së blerjes së aksioneve”, datë 02 maj 2022, shitësi ka titullin dhe pronësinë e plotë mbi aksionet. Aksionet përbëjnë [.....] të kapitalit të emetuar të shoqërisë *Autozentrum Sport AS* dhe janë të emetuara në mënyrë të vlefshme dhe të shlyera plotësisht. Shoqëria *Autozentrum Sport AS* pas transaksionit do të riemërtohet [.....].

Blerësi dëshiron të blejë nga shitësi dhe shitësi dëshiron të shesë tek blerësi [.....] sipas termave dhe kushteve të përcaktuara në këtë marrëveshje. Në të njëjtën datë, palët kanë lidhur një marrëveshje aksionarësh për të rregulluar më tej termat dhe kushtet e bashkëpunimit në lidhje me tregtimin me shumicë dhe pronësinë e përbashkët të shoqërisë pas mbylljes së transaksionit.

Data e mbylljes së transaksionit të njoftuar do të jetë [.....]. Aksione shitjeje [.....] do të blihen nga blerësi sipas kushteve të kësaj marrëveshje.

Transaksioni i propozuar konsiston në blerjen e propozuar të [...] aksioneve në shoqërinë Autozentrum Sport AS nga shoqëria Dr. Ing.h.c.F. Porsche Aktiengesellschaft.

Transaksioni është në përputhje me nenin 10 dhe 12 të ligjit nr 9121 datë 28.07.2003 “Për mbrojtjen e konkurrencës” dhe si i tillë është objekt autorizimi nga Komisioni i Konkurrencës.

III. Vlerësimi i konkurrencës

Referuar nenit 3, pika 7, të ligjit nr. 9121, datë 28.07.2003 “Për mbrojtjen e konkurrencës”, si edhe Udhëzimit nr.76, datë 07.04.2008 “Për përcaktimin e tregut përkatës”, treg përkatës konsiderohet tregu i distribucionit/furnizimit me shumicë të automjeteve për pasagjerë, por duke qenë se transaksioni nuk do të ketë asnjë ndikim në tregun shqiptar si edhe duke iu referuar praktikave të Komisionit Evropian në çështje të ngjashme, tregu përkatës i produktit do të lihet i hapur. Treg përkatës gjeografik do të konsiderohet territori i Republikës së Shqipërisë.

Transaksioni i propozuar është përfitim i kontrollit të shoqërisë Autozentrum Sport AS nga shoqëria Dr. Ing. h.c. F. Porsche Aktiengesellschaft.

Dr. Ing. h.c. F. Porsche Aktiengesellschaft është një filial i zotëruar në mënyrë indirekte nga Volkswagen Aktiengesellschaft, kompania mëmë e Volkswagen Group. Grupi Volkswagen është prezent në Shqipëri përmes dy filialeve të saj: Porsche Leasing SHA dhe Porsche Albania SHPK.

Autozentrum Sport AS, nuk ka prezencë ligjore në Shqipëri.

Pas implementimit të transaksionit, target do të zotërohet [...]Porsche dhe [...] nga Autozentrum Holding AS.

Transaksioni i propozuar nuk do të ketë asnjë ndikim në tregjet përkatëse në çdo juridiksion përveç se në Norvegji. Porsche nuk është aktiv si importues/shitës me shumicë, në vendet ku ka marrëveshje ekskluzive të importit dhe shpërndarjes me palë të treta. Porsche nuk është aktiv si shitës me shumicë i produkteve Porsche në Norvegji.

Përqendrimi nuk do të krijojë mbivendosje ose marrëdhënie të rrjedhës së sipërme apo të poshtme midis aktiviteteve të palëve në nivel kombëtar dhe për këto arsye, transaksioni i synuar nuk do të sjellë asnjë ndryshim dhe nuk do të ketë asnjë ndikim në tregun shqiptar.

PËR KËTO ARSYE:

Komisioni i Konkurrencës, në bazë të nenit 24, shkronja d dhe nenit 56 pika 1 të ligjit nr. 9121, datë 28.07.2003 “Për mbrojtjen e konkurrencës”,

VENDOSI:

1. Të autorizojë përqendrimin e realizuar nëpërmjet përfimit të kontrollit të shoqërisë Autozentrum Sport AS nga shoqëria Dr. Ing.h.c.F. Porsche Aktiengesellschaft.

2. Ngarkohet Sekretari i Përgjithshëm për njoftimin e palëve dhe dërgimin e vendimit pasi të bëhen pagesat që parashikon rregullorja “Për caktimin e shpenzimeve për ndjekjen e procedurave pranë Autoritetit të Konkurrencës”.

Ky vendim hyn në fuqi menjëherë.

KOMISIONI I KONKURRENCËS